



Kabarett „Sachsenmeyer & Co.“
09224 Chemnitz
Feenweg 11

Hauptspielstätte:
Kabarett-Kiste (im Hedwigshof)
An der Markthalle 8
09111 Chemnitz

Bestell-Telefon: 0371 - 694 77 11
www.sachsenmeyer-kabarett.de
e-Mail: sachsenmeyer@t-online.de

43. Kalenderwoche – ab 24. Oktober 2010

Isch vorschdeh Bahnhof!

Ährlisch - Demmogradie is manschma ziehmlich bleede! Warum sin denne de Schduddgardor so geeschn dähn neun Bahnhof? Bloß weilor so deutor is?

Nee, sollor doch deutor sein! E Bahnhof is doch immorhin e bleibendor Währd! Liebor e Bahnhof als wie eene gereddede Bank! Jawoll, da häddn se off de Schdraße gehn missn - de Schduddgardor! Nee, wo de Bankn Milljardn vorschluggd ham, fiehr nischd un widdor nischd... - da hammse schdille gehaldn. Abor nu geeschn dähn Bahnhof! Beglobbd! Odor wie dun Sie das sähn?

Guhd, da solls ooch noch e baar deschnische Broblehme gähm... un weeschn dor Geologie isses villeischd schwierischer, als wie se bis jedzde gedachd ham... un off dähm Bladz vom aldn Bahnhof soll eene neue Siddy endschdehn... zähn Milljardn solln investierd wern! Das bring doch Schwung in eene Schdadt! Ansonsdn is das Brojeggd iebor viele Jahre dursch alle Inschdanzn durschgejachd wordn - sozusachn. Da dud off dor Baugenähmischung nisch e eenzschor Schdembl fähln! Un bledzlich ieborleeschn sisch das welsche - un saachn nee! Is das denne in eenor Demmogradie ieborhaubd erlaubd? Wenn eene Mährheid dafiehr gewähsn is, dann is doch Bumbe mid Brodesdiern! Irschendwann musses doch ooch ma losgehn dürfn! Mor kann doch nisch, wenn eene neue Mährheid zusammkomm dud, alles, was de alde Mährheid beschlossn had, riggänglich machn! Das däde doch bloß e dauorndes Hin- un Hähr gähm. Da däde nie was ferdsch wärn, was längor brauchn dud, als von eenor Wahl zur näschsdn Wahl!

Guhd, es dud e Reschd off Demonschdradsjohn gähm... okeh, abor wenn dor Zuch eema abgefahrn

is, da muss doch ma guhd sein. Die häddn doch vor fuffzn Jahrn brodesdiern kenn, wo das losgegang is. Das kann doch nisch alle finf Firze lang nochema neu offgekochd wern! Odor?

Manschma gloob isch fasd, da duds e baar Leide gähm, die ham irschendwie Hummln im Gobb... die missn irschendwie was begämbfn! Die dun das brauchn fiehr dähn Lähbenssinn odor so. Wenn die nisch geeschn was sein kenn, da dun die de Sinngriese grischn. Warum lähbe isch? Warum gehorsche isch meinor Frau? Warum griesche isch meim Scheff in dähn Hindorn?

Ja, irschendwo missn die ihre Aggressividäd auslähm kenn! Un wenn die in Schduddgard ehm keene Landebahn fiehr Fluchzeische baun wolln... un ooch kee neues Adomgrafdweg, dann muss ähm e neuor Bahnhof hährhaldn!

Doof is nadierhlich, wie sisch de Bollezei daderbei offgefiehrd had. Isch däde de Bahnhofsgeschnor eenfach sidzn lassn, bis dor erschde Bodnfrosd gommd. Dann haun die von selbor widdor ab! Un wennse de Bauarbeidn behindorn dun, dann muss mor die ehm ganz ordnunggemäß vorhafdn - nach Reschd un Gesedz! Ganz heeflich! Nisch mid Bfefforschbreeh un Wassorwärfer! Das is doof gewähsn. Abor ansonsdn... es dud doch werglich genuch gähm in dähm Schdaad, wo de dageeschn sein kannsd... - musses werglich e Bahnhof sein?

Eduard Sachsenmeyer